

# Održan trening za predstavnike Vijeća učenika srednjih škola Zeničko-dobojskog i Bosansko-podrinjskog kantona

- 05.11.2017. u 12:16

## DEŠAVANJA



**Za predstavnike Vijeća učenika srednjih škola Zeničko-dobojskog i Bosansko-podrinjskog kantona, 3. i 4.11., održan je trening u prostorijama Franjevačke klasične gimnazije u Visokom.**

Ciljevi treninga bili su razvijanje godišnjeg plana aktivnosti na nivou ova dva kantona i odabir novih rukovodstava.

Srednjoškolci su radili na identifikaciji problema u školama i na smišljanju projekata za njihovo rješavanje. Dok se razgovaralo o ovome, jedni drugima su ukazivali na dobre ideje, na greške, na loš pristup određenim stvarima i onda, dijeleći svoje iskustvo, predlagali bolje metode za suočavanje s određenim pitanjima te za njihovo rješavanje. Kao glavni problemi isplivali su: nasilje među učenicima raznih oblika (fizičko, emocionalno, cyber nasilje), nedovoljna suradnja škola, koja kao rezultat ima velik broj predrasuda među učenicima različitih škola, i loš odnos učenik-profesor.

Održana je i prezentacija Europskog sela te izbori rukovodstava

Europsko selo je jedinstven projekt u cijeloj Europi osmišljen u BiH. Plan je izgraditi naselje u kojemu će svaka kuća biti predstavnicu kulture jedne države Europe. Pored ovog kulturološkog aspekta, ono će služiti kao mjesto za ostvarivanje razmjene učenika mnogo šireg raspona i kao mjesto za održavanje raznih programa obrazovanja za mlade.

Na izborima su birana rukovodstva za Zeničko-dobojski i za Bosansko-podrinjski kanton. Za Bosansko-podrinjski kanton, predsjednica, prvi i drugi zamjenik redom su: Melisa Selak, Edin Ćurovac i Erna Selak, a u Zeničko-dobojskom, predsjednica, prvi i drugi zamjenik te PR su: Ida Tokalić, Velida Sikira, Tarik Halilović i Daniel Glavaš.

*Ovim treningom, pored rada na aktivnostima i izbora, radilo se se na razvijanju duha učesnika kako bi bili što bolje vođe i što bolji primjeri snage mladih, volje i želje mladih za boljim. Radilo se na poticanju učesnika da budu primjeri ljudi koji ne dopuštaju pasivnost u suočavanju s negativnim, ljudi koji ne dopuštaju da dobra prilika prođe pred očima. U prilog ovome išlo je to što su upravo takvi ljudi govorili ovo, poučavali ovo i tako postali živa motivacija i primjer pretvaranja riječi u djela, zaključio je Daniel Glavaš, PR Mreže Vijeća učenika Zeničko-dobojskog kantona.*